

## Ekwo-ozì K'èbo Pyita Deru

<sup>1</sup> Ekwo-ozì-a bẹ shì l'ẹka mbedua, bụ Sayimonu Pyita, onye ejeru Jizosù Kéreshi ozi; bya abụkwarupho onye-ishi-ozì iya. Ndu mu ede iya anụ bụ unubẹ ndu ono shì l'apfubekoto kẹ Chileke mẹ kẹ Onye-Ndzota bụ Jizosù Kéreshi nata ekweta ophu bụ ọkpobe iya gẹ k'anyibedua.

<sup>2</sup> Gẹ Chileke mekwaa g'unu kabaa ya amaru; l'o mekwapho g'unu kabaa amaru Nnajiuphu anyi bụ Jizosù ọkpobe amaru eje. G'eze-iphe-oma mẹ ẹhu-guu, shì iya l'ẹka rwube unu ẹka rwube iya k'anyinyi.

### *Chileke kuru unu bya ahota unu*

<sup>3</sup> Anyi maru Nnajiuphu ono marweta iya ree; mbụ onye ono, bụ iya kuru anyi g'anyi bya g'anyi l'iya gbarụ mgba l'odu-biribiri iya; waa l'iphe-oma, ọonoduje eme. Oo l'amama ono, anyi maru iya ono bẹ Chileke shì gude eze ike nkiya nụ anyi iphemiphe, mkpa iya duru anyi g'anyi gude nọduru iya ndzụ; emekwapho umere, egoshije l'anyi akwabẹ iya ùbvù. <sup>4</sup> Oo eze ike iya ono bẹ o gudekwapho kweshia anyi ukwe-iphe, dukota ree ọkpobe adudu; ukwe-iphe dakiri atụ onu iya; ọo ya bụ g'unu egudekwanụ k'ukwe-iphemiphe ono gbakuta azụ l'emebyishi onwonye ono, ndu

mgboko-a l'emebyishi onwophe; kele ephe eye-dzujeru onu l'egu ejo-iphe anoduje agugbabe phe nu; waa g'unu le Chileke agbaru mba meje umere omaa ono, oome ono. <sup>5</sup> Oo ya bu g'unu kukebeje ehu se g'unu meje umere omaa yekwa l'ekweta unu. Iphe ozo, unu e-yekwa l'umere omaa aburu anwuta. <sup>6</sup> Iphe ozo, unu e-yekwafua l'anwuta iphe aburu esede onwonye. Iphe, unu e-yekwakwanu l'esedeje onwonye aburu ota-nshi. Iphe, a-nodukwa nu etso ota-nshi aburu akwabẹ Chileke ubvu. <sup>7</sup> Akwabẹ Chileke ubvu aburu iphe, a-nodu etso iya nu bu ehe onwunu. Iphe ozo, unu e-yekobefua l'ehe onwunu ono aburu n-yemobu. <sup>8</sup> Unu -nodu emewaa egube umere ono eje l'iphu be unu taa bukwaru 'ogalemkpa; ophu unu abueduru ndu ta amidu mebyi; l'amama unu maru Nnajiuphu anyi, bu Jizosu Kereshi. <sup>9</sup> Ole-a; onye iphemiphe ono teke erwubedu eka; atsukwa ishi; mbu l'onye ono ta ahumajedu iphe, no enya. Teme onye ono zohawaa l'oo Jizosu be sashikotaru iya iphe-eji, o shi mehawaa.

<sup>10</sup> Oo ya bu le-a; unwunna mu; o kwa unu bu ndu Chileke kuru hota unu mee unu buru unwu iya. Oo iphe ono meru g'o gude unu jee ekukebeje ehu eme g'unu gude umere unu egoshi l'unu bupho unwu iya obu eviya; le teke unu emewaa iphemiphe ono be unu ta abyakpokwa eshiswe uzo. <sup>11</sup> Unu -nodu emewaa nno ta adukpoekwa iphe, byakpo o anochi unu uzo g'unu ta abahushi l'aliz-eze Jizosu Kereshi, bu Nnajiuphu anyi, bya aburu Onye-Ndzota anyi.

<sup>12</sup> Noo g'o gude mu nọdu arị lẹ mu anyatajẹkpoerupho unu iphemiphe ono. Mu makwaru-a l'unu machahawaru iya; teme l'unu pfushiwaru ike l'okpobe-opfu ono, e ziru unu ono. <sup>13</sup> O buru iya meru mu nọdu arị l'ọ ka ree gẹ mu nyatakotaru unu iphemiphe ono nta-a, mu nọkwadu ndzụ l'ulo-ekwa k'ogwẹhu-a gude yeru unu okú; <sup>14</sup> eshinu mu mawaru l'ọ tọ dudu g'ọo nọ-bekwaduru nta-a; mu alashia; noo kele Nnajiuphu, bu Jizosu Kéreshi bẹ goshiwaru mu l'o rwuwaru mu l'alala. <sup>15</sup> Mu e-kukebekpọepho ẹhu anyataru iya unu; k'ọphu bu mu -anọedu; unu ta azọhabaedu iya azọha.

*Ndu gudekpọo ẹnya phẹ huma ùbvù, Chileke kwabẹru Kéreshi*

<sup>16</sup> Lẹ teke anyi ziru unu k'ike Jizosu Kéreshi ono, bu Nnajiuphu anyi ono, bu ike, oo-gude bya ozo ono; bẹ ọ tọ bukwa akọ-iphè, nemadzụ ritaru l'oriri iya bẹ anyi kọru unu. Anyibedua bẹ gudekpọkwa ẹnya anyi huma ọdu-biribiri iya. <sup>17</sup> Kele Chileke, bu Nna kwabẹru iya ùbvù bya emee ya o gbua nwịnwii teke ono, ẹguru olu-opfu ono shi l'akpabiri Ogbu-nwịnwii rwua ya nchị sụ: "Onye ọwa-a bu Nwa mu nwoke, mu yeru obu; o jiru mu ẹpho." <sup>18</sup> Anyibedua l'onwanyi nụmakwaru olu-opfu ono, shi l'imigwe ono teke ono, anyi l'iya tukuru nọdu l'eli ùbvú, du nsọ ono.

<sup>19</sup> Anyi kabaa ekweshi ike l'iphemiphe ono, ndu mpfuchiru Chileke pfuhawaru ono bẹ bukota okpobe-opfu g'ọ ha. Oo-buru unu eme ree mẹ unu -nọdu angabeje iya nchị; unu du

g'iphóró, nọ l'ẹka ọchii agba jasụ nchi abọhu; gẹ kpokpode nchi-abọhu ono ekeahaa paapaapa l'obu unu. <sup>20</sup> Ọle ọphu kachakpọonu, bụ ọphu unu e-vukpọadaru ọzo maru bụ lẹ-a; iphe, ndu mpfuchiru Chileke pfuru ta adukwa ọphu ẹphe shi l'uche pẹ pfua g'ọ dọ pẹ. <sup>21</sup> Kẹle mpfuchiru te eshidu l'uche nemadzu. Obenu lẹ ndu mpfuchiru, dọ-nsọ pfuru opfu, shi Chileke l'ọnu gẹ Unme-dọ-nsọ meru g'ẹphe pfua ya.

## 2

*Iphe, e-me ndu mpfuchiru, epfu iphe, Chileke epfuduru*

<sup>1</sup> Lẹ teke ndiche bẹ o nwekwaru ndu mpfuchiru shi epfuje iphe, Chileke epfuduru. Nokwaphọ g'ọ dọru ndu a-nọdu l'echilabọ unu ezi iphe, Chileke epfuduru. Ẹphe a-jikachakwa jika Nnajiuphu anyi, bụ Jizosu; mbụ onye ono, bụ iya gbafutaru pẹ l'ẹka iphe-ẹji ono, ẹphe shi eme ono. Ọo iphe ono meru g'ọ gude iphe-ẹji, ẹphe meshiru tukoru pẹ l'ishi. Ọ buri iya e-me ẹphe alaa l'iyi ẹgwegwa. <sup>2</sup> Ikpoto nemadzu e-mechakwaa tsoahaa pẹ; meahaa ẹjo ememe. Ọoburu iphe, ẹphe a-nọdu emegbabe bẹ ndu ta abudu ndu kẹ Chileke ee-gude wata epfubyishi ọkpobe-opfu ono, bụ iya bụ ọzo kẹ Chileke ono, anyi etso ono. <sup>3</sup> Ndu ono, anọduje ezi unu iphe, abudu ọkpobe-opfu ono bụekwapho ẹkpiri okpoga bẹ eshitajẹ pẹ iphu. Ẹphe -gbeshi; ẹphe atuko ọka, nọ lẹ mgboko dzushia wushiru unu. Ẹphe egude nno ghopyabe unu l'ughu; ria unu

okpobe okpoga. Oḷe ọ tọ dọekwanu g'oo-nọberu nta-a; Chileke anmaa ẹgube ndu ono ikpe. Noo keḷe Chileke pfuhawaru iya rọ teke ndiche doḅe edobe. Mbụ l'iphe ono, bụ iya e-gbu ndzụ phẹ ono te ekujekwa mgbenya.

<sup>4</sup> Lẹ-a; ọ -bụru lẹ Chileke ta ahaduru unwu-ojozi-imigwe, meru iphe-eji g'ephe ria ya ke mmanụ; ọ tua phẹ mkpọro chiru ye l'oku-alị-maa; lẹ tsukiribaa ẹka agba ọchii g'ephe nọdu ngaberu mbọku ikpe onoya; <sup>5</sup> ọ -bụru lẹ Chileke ta ahaduru ndiphe ono, meru iphe-eji teke ndiche ono ke mmanụ; obenu l'o gude utso bya atuko unwu-eliphe ono rigbushia; ndu ọ dzotaru buerupho Nuwa, bụ onye ezi phẹ k'apfubekoto waa umadzu ẹsaa ọzo kpoloko; <sup>6</sup> ọ -bụru l'ọ nmaru Sodomu yee Gómóra ikpe gude ọku tsufukota phẹ ephe bụru ntụ; ephe chihu lẹ mgboko l'ophu; shi nno mee ge ndu ta akwabedu Chileke ubvù maru ẹgube iphe, ya e-me phẹ; <sup>7</sup> teme ọ buerupho Lotu, bụ onye pfuberekoto be ọ dzoru l'eka ono, ndu eme ejo-ememe bu ono. Nno l'o shi abujeru; ndu alị ono -nọdu eme ejo umere, rehuru erehu ono; l'ọodu Lotu eji shii; bya atsukwa iya phọ l'ehu atsushi iya ya ike. <sup>8</sup> Mbụ-a; ọ tọ dudu mbọku-mbọku, nwoke ono pfuberekoto ono te eshidu aphurwushije ẹnya; anurwushi nchị l'ejo-ememe, ndu iphe-eji ono shi anọduje eme; k'ophu bụ l'ejo-ememe, oogudeje ẹnya huma me ophu ọonu lẹ nchị shi anọduje agbawashi iya obu.

<sup>9</sup> Oniya bụ l'ọ -bụru l'o noo g'ọ dọ bụ ono; ọọ ya bụ lẹ Nnajiuphu maru-a g'oo-me dzọo ndu kweru nkiya; maru g'oo-me yeru phẹ ẹka

g'ephe nahu iphe-ehuka, byapfutaru phe nu; bya amakarupho g'oo-shi tuchia ndu iphe-eji l'eka ephe a-nodu; l'o nua phe aphu k'iphe-eji, ephe meru; o buru eka ono be ephe a-nodu jeye mboku ikpe. <sup>10</sup> Mbua; ndu o-kachakpo njo bu ndu ejo-iphe ono; mbu ndu ono, buepho iphe, ephe anodujeepho achu bu g'ephe mee iphe, bukpo iphe, egu iya enwu phe phuruphuru l'ehu; mbu iphe, bu ephe -mee ya; ephe emerwushia onwophe; ndu adudu onye ephe anuru opfu; mbu ndu ono, ezi iphe, abudu okpobe-opfu ono; ndu bu 'anu-le-nchi; ndu anoduje eku onwophe ekuku; ndu ata atsujedu ebvu epfubyishi ndu ono, a ta ahumajedu l'enya l'ogbu-nwiiinwii imigwe ono. <sup>11</sup> L'unwu-ojozi-imigwe be kakwa ndu ono ike okpobe akaka bya akakwa phe pho enweru unme; ole ephe te ejejekwa anodu l'iphu Chileke epfurwushi phe su l'ephe meru eji. <sup>12</sup> Obenu le ndu owa-a; bu iphe, edoduru phe enya be ephe anoduje epfubyishi. Ephe du g'anu-egbudu, enwedu egomunggo, bu iphe, a nwudoru phe bu g'a nmataje phe l'onya gbua; o buru g'e meru anu-egbudu bu g'ee-me phe; ephe alaa l'iyi. <sup>13</sup> Oo iphe ono a-buru urwu, ephe e-rita l'ejo-iphe ono, ephe yeru eka ememe ono. Je akpachakpo l'echilabo eswe be ephe anodujeela-a eme g'ephe ria iphe ono, egu iya enwu phe phuruphuru l'ehu ono; ephe -nodu eme iya ehuru atsule phe-a utso. Ono bu iphe, iphere bya aburu iphe, uta me unu -nodu ahaje phe g'unu l'ephe tuko eri nri; me unu dokobe eri nri.

<sup>14</sup> Lenea l'obujeru; enya phe -humawaa

nwanyi; l'ogue phe pho g'a su l'ephe le nwanyi ono kwaru. Ophu o dudu teke egu eme ejo-  
iphe agu-bujuje phe agu-buhu. Ntanta-a ephe  
edetawa ndu ophu ano-shiduru ike l'iphe, ephe  
kwetaru; ephe anma l'onya phe. Iphe, doru  
phe enya buepho g'ephe e-shi kpaa okpoga.  
Ono be ephe metawaru jeye o ria phe ishi;  
ephe buru ndu a tawaru onu! <sup>15</sup> Ephe paru  
okpobe uzo ono, pfuru nhamunha ono haa eje  
phururugbaada; bya eetsowaa aka Belamu, bu  
nwa Bosoru; mbu onye ono bu iphe, o yeru enya  
bu okpoga, okpa l'uzo apfuduru oto ono. <sup>16</sup> A  
baaru iya mba ejo-ememe ono; k'ophu bu le  
nkafu-igara, ete pfujedu opfu saru onu pfua  
opfu ge nemadzu gude kposhia onye mpfuchiru  
ono eme umere onye obvu.

<sup>17</sup> Ndu ono, ezi iphe, abudu eviya ono bu  
'ogalemkpa. Ephe du g'obvu, mini tahuru.  
Ephe du g'igwe -rwuchaaru erwurwu k'edze  
mini; pherephere zikaa ya. Chileke nmawaru  
phe ikpe. Aka akwakoberu phe be gbahuru  
tsukiribaa. <sup>18</sup> Ephe anodujeepho epfu g'o bu phe  
kachaa amama; temanu opfu obu abukwarupho  
mkpokoro opfu. Ephe nodu egudeje iphe ono,  
egu iya enwu phe phuruphuru l'ehu ono gbafe  
onye nmata ndu buwokwadu-a be ephe nahuru  
ndu eshiswe uzo. <sup>19</sup> Ephe ekweje phe ukwe  
enweru onwonye; ole ephebedua l'onwophe  
te enwekwanu onwophe. Ephebedua bu ohu  
umere, rehuru erehu ono, ephe anoduje eme  
ono. Noo kele o iphe, ka amadu ike; lwu-kpee  
ya be amadu bu ohu iya.

<sup>20</sup> Mbu le ndu ono nwekwaru-a teke ephe shi

maru Nnajiuphu anyi, bu Jizosu Kéreshi okpobe amaru; mbu Onye-Ndzota anyi ono. Su ophu ephe eshiedu eshi ejo uzo ono, emerwuje unwuliphe ono. A nonyaepho; ejo umere ono, ephe shi hawaa ememe ono lwa azu bya eria phe ishi ozo; ka phe ike lwu-kpee phe. O kwa iya bu l'onodu ehuru onye ono abya aka njo; eme le go duhawaa le mbu. <sup>21</sup> Mbu-a; o gogo kakwaru egube onye ono ree; ome o to dukpodaa teke o majeru uzo bu o -shia ya; Chileke agua ya l'onye pfuberekoto; eme l'onye ono machaaru uzo ke Chileke bya atsuhu-pha azu haa emeje ekemu ono, Chileke turu iya ono. <sup>22</sup> O kwa iya bu l'iphe ono, aanmaje letu ono a-vua l'ehuru onye ono, bu iya bu etu, a nmaru, suru le "Nkuta nwachaaru enwa laphu azu je erichaa ya." Etu ozo buru le "Ezi be a wuchaaru ehuru; o laphu azu je ebvua epuchi." Noo ge ndu ono du bu onoya.

### 3

#### *Nnajiuphu a-bya ozo*

<sup>1</sup> Ndu mu yeru obu; owa kweakwa akpo ekwo-  
 ozi ebolechiko, mu dewaru unu. Lime ekwo-  
 ozi labo ono be mu dewaru gude yeru unu  
 oku; nyataru unu g'unu rije oriri iphemiphe  
 ono, e ziru unu ono. <sup>2</sup> Oo ya bu; unu ny-  
 atajekwa opfu, ndu mpfuchiru Chileke ono pfuru  
 teke ndiche. Ndu ono bu ndu eeyeru ubvu.  
 Unu anyatajekwapho iphe ono, Nnajiuphu, bu  
 Onye-Ndzota ono shi leka ndu-ishi-ozu iya zia  
 unu. <sup>3</sup> Iphe, e-vukpodaru uzo doo unu enya  
 bu owa kpoda; mgboko-a bya l'abvu be o



nwekwaru ndu e-mechaa buru ndu taa dujedu ike sede onwophe l'egu ejo-iphe, enwu phe phuruphuru l'ehu; bukwarupho ndu a-noduje aja unu ewenu. <sup>4</sup> Iphe, ephe e-pfuje bu; “? Denuhunu Jizosu obu, kweru unu ukwe le ya a-bya ozo obu? Kele e -shi teke nna anyi oche phe noru laa be iphemiphe dukwapho g'o du; e -shi teke e meru mgboko.” <sup>5</sup> Ephe elekebekpopho enya; jika jinya enya l'ephe taa ridu oriri iphe ono, Chileke meru teke ndiche ono. L'oo opfu, Chileke pfuru l'onu kpoloko be o gude mee igwe mee ali. Ali shi le mini du; o buru mini ono meru iphe ndzu du le mgboko. <sup>6</sup> Teme le Chileke meru igwe dzee mini; rigbukota iphe, shi du le mgboko ophu shi du teke ono l'ophu; o buru ola-l'iswi. <sup>7</sup> Igwe yele ali, bu ophu du nta-a bukwa opfu onu be e gude sede iya g'o nodu jeye mboku, oku e-kepyashi iya, bu iya bu mboku oke ikpe ono. Noo mboku, Chileke a-nma ndu ta anuduru iya opfu ikpe; mee phe ephe aburu ola-l'iswi.

<sup>8</sup> Ole-a; ndu mu yeru obu; iphe lanu unu ata zohajedu bu l'enya nnajiuphu be ujiku lanu dukwa iya-a g'unu-kuru-unu apha; unu-kuru-unu apha dukwa iya pho g'ujiku lanu. <sup>9</sup> Nnajiuphu ta akpukwa ehuh akpukpu eme iphe, o kweru ukwe iya, bu iya bu iphe, ndiphe anoduje ari. O kwa nshi be ootaru anyi kele o to dudu onye o du iya g'a su l'o laru l'iswi; o chia g'izimanu lwa onyemonye azu.

<sup>10</sup> Mbu le mboku, Nnajiuphu a-bya be oo-byakwa g'onye-oshi byaru oshi l'enyashi. Mboku ono be igwe e-deru riiriirii mihu. Iphemiphe, du l'igwe; kpokpode me onwa me

enyanywu be oku e-kekota. Mgboko l'ophu mekpoo akanya, ndiphe seru dobe l'ime iya be oku e-kepyashikotakwa. <sup>11</sup> Eshinu unu mawaru l'iphemiphe-a, du le mgboko-a bukota iphe, e-kepyashihu l'oku; unu kwabekwarupho onwunu enya meje umere, gbaru unu l'ememe. Unu nujeru Chileke opfu; unu eworu ndzu unu g'o ha ye iya l'eka g'o bukotaru nkiya. <sup>12</sup> Unu chierupho enya yee l'uzo; ngaberu mboku, Chileke a-bya emebyia mgboko-a. Oo mboku ono be Chileke a-tu oku l'igwe; oke okpomoku apaa aka; k'ophu iphe, nokota iya nu a-dazehukota. <sup>13</sup> Ole-a; Chileke be kwekwaru anyi ukwe emefuta igwe ophuú yee mgboko ophuú. Ono buwaa ndu pfuberekoto l'enya Chileke bu ndu e-buru iya nu kpoloko. O buru mgboko ophuú ono be anyi ele enya iya.

<sup>14</sup> Oo ya bu; ndu mu yeru obu; eshinu unu ele enya iphemiphe-a; unu kukebeepho ehu dobe onwunu oru g'o to du iphe, aa-ta unu uta iya l'iphu Chileke. G'unu le Chileke du le ree. <sup>15</sup> Unu anyatajekwa l'iphe, meru g'o gude Nnajiuphu nodu ata nshi ono bu g'unu bya ge ya dzoo unu. O kwapho iphe ono be nwanna anyi Polu, anyi yeru obu dehaakwarupho unu l'ekwo-ozu, o detaru unu. O kwa Chileke be nuru iya mmamiphe, o gude dee ya. <sup>16</sup> Le-a; iphe, bukotakpoo ekwo-ozu, o deru g'o ha be o pfukotakwaru opfu iphe-a, e-mechaa mee nu-a l'iphe, bukpo ekameka, o pfuru opfu gbaa ya okpa. Iphemiphe ono, Polu deshikotaru ono nwekwaru ndu ophu oopfuje, te ekwejedu edo enya. O buru iphe ono meru g'o gude ndu amadu

iphe; mbu ndu apfushiduru ike l'ekwekwe, ephe kweru ke Chileke; nodu ewojeru iya gha igharaphu, buhukwaa g'ephe aghaje ikpoto iphe ozo, e deru l'ekwo-opfu Chileke. O buru egube ono be ephe emeje gude aka phe meta ola-l'iswi tukobe onwophe l'ishi.

<sup>17</sup> Oo ya bu; ndu mu yeru obu; eshinu unu vuwaa uzo makotaru iphemiphe-a; unu kwabekwaru onwunu enya ge ndu ejo-mboku ono te eduphu unu; g'ephe te eme unu g'unu kweta l'uka ono, ephe anoduje adzushi ono be bu okpobe-opfu; shi nno mee g'okpa chiswafu unu g'unu lufu l'okpobe uzo ono, unu pfuru pfushia ike ono. <sup>18</sup> Oo ya bu le-a; g'eze-iphe-oma ke Chileke nodu aka shii l'ehu unu; unu akakwapho amaru Nnajiuphu anyi bya aburu Onye-Ndzota anyi, bu Jizosu Kereshi okpobe amaru. Oo ya kpoloko kpeekpu bu onye aa-nodu akwabe ubvu mboku-mboku jasu le tuutuutuu le mijimiimii. Nokwa g'o du.

**Bayiburu Izii**  
**Izii: Bayiburu Izii Bible**

copyright © 2014 Wycliffe Bible Translators, Inc.

Language: (Izii)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

c6885c7c-c550-5b8b-a4fe-4bd714af4f6d